

Mendiguaizaletasunari jarriak

I

Kritika denek autokritika
behar dutela jakinda,
bertso sorta bat jartzera noa
bestela zeri ekin ba!
Lehengo batean pentsatu nuen
etxean egon ezinda
goiza pasatu behar nuela
mendi-buelta bat eginda
barkatu, orain *trekking* da.



NAGORE LEGARETA

IV

Lehengo zahatoa gaur *camelbaka*
edo gerrian botila.
GPSaz fidatzen gara,
zertarako harrespila?
Hiru-lau barra energetiko...
eta, patata-tortila?
Bi bastoirekin goazen artean
itsu-itsu tontor bila
nork dakar urritz-makila?

II

Egia esan, ez naiz askotan
mendian zehar ibiltzen.
Baina Txindokin izan nintzela
nola ia aspaldi zen,
joan nintzen da iturrirako
hasi nintzenez umiltzen,
bertan eseri eta jendea
hasi orduko hurbiltzen
begira geratu nintzen.

V

Txubaskeroa ordezkatu da
termiko ta *gore-texez*.
Windstoper-ez babesten gara
ez berokiz ta ez jertsez.
Burua bete dugu mendian
aurki ez litekeen haizez...
Ia mendira ateratzeko
tarteka igande goizez
jakin behar da inglezsez.

III

Jantzi galtzerdi erronbodunak,
boten mihiari tira.
Panazko galtzak, heltzen zirenak
belaun nahiz zango erdira...
Noiznahi gelditu eta zeudenak
paisajeari begira
txanoa eta zahatoarekin
joaten zirenak mendira
orain nora joaten dira?

VI

Lehengoa nonbait paseoa zen
oraingoa kirola da.
Espero gabe nahi ez genuen
hura gara beharbada.
Euskaldun pijo moderatuak
Himalayako modara.
Ondorioa ez da hain zaila:
portatzen garen erara
martziano hutsak gara.

DOINUA: "Saltarina da txepetxa eta".



Bidali zure sortak bertsoak@argia.com helbidera. Balekoak orri honetan argitaratuko ditugu.